

人物

孝友

魏

許

絳州人 世傳禮武具之立孫三世同居閨門雍睦吏部尚書李神儁嘗稱

其家風自侍御史累遷尚書左民部司徒諮議叅軍修起居注後拜大中大夫興
和初卒年四十七贈使持節都督冀瀛二州諸軍事征東將軍吏部尚書冀州刺
史

唐

樊 漪

依政人事親居喪著至行詔旌其門

許伯會

詢十二世孫舉孝廉爲衡陽博士遭父喪負土成墳不御絮綿不嘗滋

味野火將逮塋樹悲號於天俄而大雨火滅歲旱泉湧廬前靈芝瑞獸生於墓側

家蕭山

宋

鄭彥圭

順安軍人八世同居淳化六年詔旌其門

元

郭祥

性至孝父善母韓氏韓病祥百方求醫醫百方求療方窮而病自若祥乃剖其股爲羹以進母霍然愈其狀具墓碑

劉智

在城人職百戶親遘疾醫弗效智素聞人肝可已疾乃操刀剖腹割肝爲羹親乃瘥智尋無恙泰定中進士劉士美紀於墓石

明

鄧貞吉

龍化里人邑學生性嚴整有方幅慕張公藝爲人每以同居飭子姓其大指在獨操家柄而要曰婦言勿聽三娶生三男四女伯隆季陞蚤逝各以孤遺及次子陞操家政日申其父之訓曰事務躊躇稍不便宜公言之妯娌有相敬無相競也又傳而陞次子邦貢亦唯日遵遺訓入夜則以其甥大呼於宅曰婦言勿

聽邦貢有五子其後最少者曰九卿主農業而長子九功之子學詩主徭賦其弟姪讀者不以及小大婦女幾五十人各以女紅若機杵飲食受約束於宮氏宮氏邦貴妻也無敢違亦無敢私卽甥之孤貧者皆爲婚嫁而或食於家一時同爨者六十九人自貞吉歷六世孫金貴合之一百二十餘人同居已五世矣

齊 癯

促燈爲業促燈者削麻結可三寸而蘸硫黃可促火也齊所製多中用而人多憐其謹市之故曰可得數十錢輒市餅肉若酒一盃以餉其母或旁爲唱讚以侑母觴人稱孝子云

清

高 鋌

遷善人母田氏常病心痛至危醫不效家貧如洗鋌私計曰吾邑先有劉孝子割肝醫母母病遂愈吾母當此危時何敢自愛其身於是自入私室割肝肉暗禱於神和酒以進母病果愈後不復作時康熙二年五月十二日也張令志禧旌其門曰孺孝格天

王昭

在城人前戊寅其母李氏被兵北去昭年幼痛母生離氣絕救之甦及長棄家遠尋誓不見至死不歸尋廿載見一僧卽伊族兄亦係被兵先至者述其母年久矢志堅貞並所居昭哀募贖回母老病負母步行數千里乞食而歸母子完聚前翁令周鼎楊教諭變春俱有旌獎

李崇儒

邊村人性孝有志經書因兵荒未卒業前戊寅城陷其父死於兵崇儒尋屍負歸葬事孀母奉甘旨母卒合葬負土成墳廬於墓側時物必薦蔬食必供三年如一日後歸猶心切追思云

劉鵬雲

字化南性仁孝父故日夜悲思事孀慈愉色婉容敬養兼盡入泮後下帷攻苦志切顯揚甲子膺鄉薦母守節年久呈請旌表建坊選授懷安教諭捧檄而喜不讓昔人奉侍任所問視必勤定省罔怠母年高思歸雲不忍離辭職歸里養志承歡惟命是從卽勺水粒米不敢自私後於病篤之時以不能終養爲恨情辭悲痛終身孺慕宗黨共稱

韓泰夫

于堤村人三歲父故母齊氏矢志守節業紡績泰夫鬻於市年十三必得甘旨以承歡年十七受室朝夕慰順親心母性嚴或杖之同妻跪受後言笑如初迎養外祖母以悅親心及卒傭工三年以完殯資妹家貧加意周卹母年六十六抱病泰夫祝天願以身代母故慟幾絕晝夜號泣米不入口七日內若痴大叫母親數聲而亡時五十一歲

曹化洽

儒學武生世居邊渡口村繼叔玠祠娶妻柴氏夫妻先意承志克盡孝敬歷事三母李氏婁氏許氏皆以孝稱父患痰症三載餘夫妻奉侍湯藥掃除污穢無倦容母許氏相繼患病洽夫婦事之如父五六載晝夜在側不敢暫入私室母病久性失常時加以不堪夫妻甘心順受鄉里以孝子孝婦稱之

李玉山

邑之宿儒也性純孝好施與母得眼疾幾致失明公倉皇無以爲計乃以沃田二十畝施村中祈母無恙因以獲痊此固誠孝所格而亦善行之報也村人霑其惠而感其孝勒石以誌不忘云

齊應選

號文登生而偉岸讀書知大體事繼母孝尤篤於族族兄介徙別鄉產饒無後身歿群從欲瓜分之應選毅然持不可爲治喪卹嫠招致其姪於千里外俾承宗祧仿宋范希文法置義田一區延師儒令子弟及宗族成童者誦其中善治生明季歲祲畿南道殣相望應選出粟賑濟凡中外親故待以舉火存活者二百餘家劉氏產絕出四十金贖人稱盛德卒年七十三 畿輔通志

李清泰

世居縣之迎恩關父鏞增生客遊京師東北諸邑猝患瘋疾出走不知所之清泰時年十二兩弟皆幼家貧爲鄰傭以養母十二年以爲常弟稍長教以生計常研麥至夜分不休家稍裕遂留兩弟侍母獨出尋父母驚泣謂曰汝父布衣誰知名者且以病狂走安知存亡吾老矣不欲汝遠遊也清泰泣曰父在兒從之歸倘有不測未能歸葬何以子爲言已伏不能起母乃許之身負榜文徧求不可得遂出山海關欲自畿南越大河南下時孝名聞燕趙間肅寧城南三十里外某寺老僧寄書云往年有客死形狀類是清泰往僧言不獨貌似客所書格言數

十事故在寺壁也清泰幼失學苦不能辨歸家取父書偕族父鈞往將行母曰爾父腦後骨大驗之適合乃痛哭易棺歛時乾隆四十年也邑人欲舉孝行清泰力辭人益重之奉母數十年未嘗拂其意母患痰喘爲按摩肩背晨夕不倦母老侍病衣不解帶者三年不得治生產家復落不顧也嘉慶十年無疾卒大吏以聞得旨旌表入祠 畿輔通志

李家彥 父維肅病痿痺家彥侍疾未嘗安寢乾隆四十三年父歿哀毀不食者累日家貧不能卽葬臥柩側寒暑不衰因得足疾不能行親族勸之終不易時有祁某遺其名母疾刲股以進尋愈鄉人稱爲祁孝子韓來培字遐福監生事繼母郭孝母病欲食菱來培取之舟覆被溺及救出猶手執數枚云 畿輔通志

李興祖 少孤家貧食常不給奉祖母甘旨無缺祖母不知其飢寒也二十餘年如一日繼母躬弱多病事之如事祖母朝夕侍左右恐失繼母歡道光四年閭邑舉以孝奉旨旌表入祠 畿輔通志

楊玉相

年六歲父死兄出亡乞食供母稍長販火石得利奉母玉相有從祖父

老無子見玉相勤且孝命爲己嗣爲娶婦迎母就養母李寡居三十餘年六十有一以完節終將葬玉相泣曰母氏撫我艱苦備至我不得終子職也矣遂舍妻屏子結廬墓側朝暮上食事死如生不飲酒不茹葷口不見齒髮參參然覆其面行路哀之同治九年秋河溢水及廬側終不去知縣趙秉衡表其廬 畿輔通志

陳經奎

雍城村人事繼母以孝聞凡父母之飲食必親自檢點務求潔淨入市

必市甘旨歸以娛親數十年無少倦繼母性急多怒少喜待子女甚嚴然必善體親意務得歡心胞伯有年甚貧供養侍奉與父母無異鄉里皆稱道之

宮維寅

石家庄人天性純孝其父於七十七歲時偶得痰症起居惟艱公延醫

烹藥捧饌進食滌溺器助反側無晝無夜如是者三年曾無惰容翁病賴以少痊勉強能起立然一足殭一手不能舉箸且質性暴躁每因細故輒加怒罵而公笑臉承歡聽其訓斥翁每日須於街頭野外遊覽二三次每出公則兩手抱其腰扶

之行背負一椅腰中繫一溺器欲止則以椅扶之坐欲溺而有缶焉斯時也公之年已逾花甲矣里人因是有小老頭抱大老頭之稱如是者十有二載其父賴以終其天年里人白其事於縣長縣長命書匾額以彰其行因家貧至今尙未遂焉

陳鳳儀 字應韶邑庠生年十餘歲時捻匪擾縣境父經奎被擄儀毅然謂匪首曰汝等轉徙無常所恃與共事者少年耳吾父老且病微特不能助且反足爲累若捨我父願以身代匪首以其少也奇其言許之詭從匪行至曲堤村沒於水逃歸人稱其孝而服其智焉

人物

義行

晉

許瑤之

爲建安郡丞行廉而好賑人之急尤篤好高誼時郭原稟孝行瑤之還

家特以綿一斤遺原原不受瑤之乃自往曰歲過寒而此建安綿好聊以奉若母耳原拜而受之

魏

鄭熊

有義行其子更篤孝元魏時范陽盧度世爲東宮官以崔浩事棄官逃

高陽熊匿之使者囚熊子將加捶楚熊戒之曰君子殺身以成仁死則死耳勿言子奉命被拷掠卒無所言至火爇其身因以物故度世後以赦免

明

李預

字硯石邑庠生以子如蒞贈文林郎零陵縣知縣性敦朴修行端謹嘗

以無愧衾影自矢事繼母如母力耕苦學以忍字爲學柄受侮不怨終身無厲容
接人無少長怡如也伯父家饒足歿無子伯母陰養他氏子爲子族黨群誚之公
曰伯父無子夫非盡人之子與安忍其弗祀也旣婚而天後葬祭伯父母禮惟謹
夜得盜惻然曰迫於窮餓耳復縱去夜冒雪遠歸有醉人僵臥道中幾斃下馬扶
掖至其家俟甦乃去里人侵田至二十餘年官以其所入責償乃曰但正其田不
計其利人皆嘆服平生以大節自閑戊寅之難與父俱殉焉子如蒞成進士兩任
邑令有聲

清

孫樞

字朴菴幼讀書明大義庠序有聲性亢爽有幹略隨父福建都司任遇

海賊變自請守城鼓衆殺賊手刃七級而城賴以全堂叔因兵變流落廣東尋回
完聚延師課諸弟俱成名姑夫卒任所單身扶櫬歸自四川年七十一卒

齊國昇

南龍化村人少穎敏有膽略髫年就傳以遠大自期因遇兵荒儒業未

成順治八年村人誤被剿滅殺掠慘酷歿存飲恨昇不畏強暴挺身控部急難仗義伸雪闔里之冤一鄉完聚歿後追思子姓蕃衍舊業克復孫正弱冠入泮爲名諸生

孟登雲

梁村人孝於親事繼母如母待弟友愛弟早故恤長姪入文庠爲置產業姪與妻相繼亡遺孤九歲撫養授室孫入泮又以次姪爲嗣成其名分產同己子時遇賊衆謀劫本村男婦雲挺身率衆擒獲賊首群盜散去鄉人保全有人持私票詭稱圈地雲赴憲府稟明四村不致失業前令陳公守創特爲褒獎村地久被水患率衆築堤蒙其利歲歉出廩粟分給鄉人壽七十卒

韓鐸

字開古性孝友弱冠采芹堂姪五人分產不足以己莊基助之並付文契族姪賣與莊基既得價仍舊居住後姪貧求轉賣卽主其事不索原價歲歉捐貲濟困鄉人賴之有賣身者解囊贖回又嘗助人婚嫁村中或有爭端善言和解晚年志高豹隱怡養天年壽八十有五

劉士貴

汜頭村人順治初新倉村旗人馬三見村中富庶意圖劫掠以村人盡是土賊捏報官誤信統兵欲勦滅貴見合村負冤待斃捨命獨出與馬三質審刑訊幾死乃至誠感格夾棍木折腦箍繩斷官悟將馬三正法村人保全

王化皞

字和治東王家庄人少有膽略遇變失學性慷慨樂善好施孝親敬兄撫其姪如子歲歉出粟賑濟遇事排難解紛貧不能娶者捐以財病者施與藥死者得以葬順治六年土寇起冒死辨明本庄盡是良民人得保全不及於兵力計奸宄赴部控告將村中房地退還人皆安處如故前令廖旌之立義館延師課讀族黨賴以成名者不少壽八十四子二擎儒學生員肅任山陽丞孫維鑰分訓獻縣

韓筠

字貞公持身方正待人和平事父母得歡心父沒事母孝母老病祈代母病果愈延壽敬事諸兄視姪如子且讓產人以孝弟稱鄰佑胡姓欲賣身旗下以完官欠筠出銀代完其子三人感之路拾博野劉姓遺失衣二十件劉覓之筠

卽與之無吝色清苑張姓開布店被盜賠客銀無措欲死筠稟父給銀以救其命用銀買一四歲幼女因伊父女相哭不忍離卽還契以全骨肉不索原價年八十餘卒

孟德華

字香符良村人教諭毓珍之父御史傳金之祖也家貧充縣署戶南科經丞時城西有因案件掛誤沒收家產者人皆知其冤抑而無法救濟辦此案時公與焉暗將其千銀借券匿未入官至結案後交回事主而事主賴以生活又因急案赴任邱辦公夜返本縣路遇夫婦二人活埋其女公問明原委解說妥協認爲義女領至己家爲之嫁娶以活其命公在縣署作事拯救危難人咸稱道之年八十四卒

韓象晉

字貞明邑庠生性贛直平生抑強扶弱有富室涉訟懇公爲訟詞者業爲之矣富室出酬資數百金公遽曰詞宜改索還焚之不使上擲還其金曰吾向以子爲冤今若是是不直也不義之財污吾囊橐急將去吾不爲不直者役也

齊國琳

字林玉年十九補博士弟子員與李爵等結城社慷慨抵掌謂勳名可

立致及明亡鬻致身宰輔國琳落拓江湖未嘗一至爵門也慕孫奇逢杜越之爲

人與王餘佑交最篤延教諸子以經濟之學性勇於行義鹿善繼孫密觀丁母喪

貧不克葬國琳悉資助之吳人齊秀虧官糧捐資代輸復贖其家屬秀乞以奴僕

報不許知縣孫某蒞任問民疾苦國琳條陳利害數十事而最重者莫過里甲之

見年見年領一甲十四社每年輪流應差歲值某甲則一縣之公費悉取辦於見

年所謂遞馬工料部院奏銷起解添搭種種無名之耗不可勝數皆索給焉歲費

不下四千餘金國琳痛言其弊事竟革除邑民感之立石頌德康熙二十四年卒

畿輔通志

許希賢

南沙窩村人道光時施與村中地一頃九十三畝以供合村差徭之費

至今有樂善好施坊與碑各一

張棻

字錦芳歲貢生咸豐初江南弄兵徵調頻繁公擇良田七十餘畝施之